

ԱՆԱՀԻՏ ԱՆՏՈՆՅԱՆ

Ո՞Վ Է ՍՈՒՐԲ ՈՍԿՅԱՆՑ ԵՒ ՍՈՒՐԲ ՍՈՒՔԻԱՍՅԱՆՑ ՎԿԱՅԱԲԱՆՈՒԹՅՈՒՆՆԵՐՈՒՄ ՀԻՇՎԱԾ ՀԱՅՈՑ ԱՐՏԱՇԵՍ ԹԱԳԱՎՈՐԸ, ԵՒ ՈՎՔԵՐՆՐԱ ՈՐԴԻՆԵՐԸ

«Ըստ յոլովից սովորութեան՝ կրկին ունելով անուան...»

«Կամ միով անուամբ բազում թագաւորաց վարեալ...»

Մովսէս Խորենացի, Հայոց պատմութիւն,

գիրք Բ., գլուխ ԻԴ. եւ ԺԳ.:

Հայոց պատմութեան համար այս հարցն առանձնակի հետաքրքրութիւն է ներկայացնում՝ կասկած չթողնելու համար Սուրբ Ոսկանց եւ Սուրբ Բագրատի վկայաբանութիւններում՝ նկարագրվող իրադարձութիւնների պատմականութեան վերաբերյալ եւ լինելով վիճելի հարցերից մեկը:

Պատմագիտութեան մեջ Արտաշեսը² նույնացվում է Տրդատ Ա.-ի (66—88 թթ. կամ 61—75, 63— մոտ 80 թթ.) հետ՝ հիմնականում նկատի առնելով նրանց համար հայ եւ օտար աղբյուրներով ավանդվող նույն ժամանակաշրջանը եւ երկուսի վերաբերյալ հիշված պատերազմն ակադեմիկոսների դեմ: Պատմիչներից ավանդված կենսագրութեան եւ գործունեութեան գերակշիռ մասով, սակայն, Արտաշեսը, համաձայն պատմագիտութեան մեջ ընդունված տեսակետի, միավորվում է Ք. ա. 189—160 թթ. գահակալած Արտաշես Ա.-ի հետ³:

¹ Մ. ՎՐԴ. ԱԻԳԵՐԵԱՆ, Լիակատար վարք եւ վկայաբանութիւն սրբոց, հտ. Բ., Վենետիկ, 1811, էջ 90—120 եւ 121—130. Ղ. ՎՐԴ. ԱԼԻՇԱՆ, Սոփերք հայկականք, ԺԺ., Վենետիկ, 1853, էջ 33—55 եւ 59—66. «Յայսմատուրք», Կ. Պոլիս, 1730, Նաւասարդ ԺԷ., էջ 14.—19. «Հայկական վարքեր եւ վկայաբանութիւններ V—XV դդ.», թարգմ.՝ Ա. Մադոյանի, Երեւան, 1998, էջ 213—216 եւ 217—229:

² Արտաշես թագավորին չենք նշում Բ. թվահամարով, ինչպէս հայ պատմիչների ներկայացմամբ է՝ շփոթութիւն չառաջացնելու համար Տիգրան Մեծի թոռ Արտաշեսի հետ (Ք. ա. 30—20 թթ.), որն Արտաշես Բ. է ճանաչվում պատմագիտութեան մեջ: Վերջինիս հայ պատմիչները չգիտեն, ինչպէս եւ՝ Արտաշես Ա.-ին (Ք. ա. 189—160 թթ.), բայց որպէս Արտաշես Ա. գիտեն Տիգրան Մեծի հորը եւ Արտաշես Բ.՝ մեզ հետաքրքրող թագավորին: Նշուած ընդարձակութեան պատճառով նաեւ խուսափել ենք մեջբերումներից՝ նշելով միայն հղումները:

³ ՏԷՄ Հ. Յ. ԱՍՏՈՒՐԵԱՆ, Քաղաքական վերաբերութիւններ ընդմէջ Հայաստանի եւ Հռովմայ 190էն ն. Ք. մինչեւ 428 յ. Ք., Վենետիկ, 1912, էջ 25, ծանոթ. 3 եւ էջ 26. Ա. ԳԱՐԱԳԱՇԵԱՆ, Քննական պատմութիւն Հայոց, հտ. Բ., Թիֆլիս, 1895, էջ 241—250. Մ. ԱՐԵՂՅԱՆ, Հայ

Արտաշես թագավորի մասին հայկական սկզբնաղբյուրների, այդ թվում նաեւ Սուրբ Ոսկյանց եւ Սուրբ Սուքիասյանց վկայաբանությունների տեղեկությունները, սակայն, հնարավոր չեն դարձնում այս նույնացումները: Վկայաբանությունների արժեքը նաեւ այն է, որ, ինչպես կտեսնենք, անկախ են հայ պատմիչներից, հետեւաբար՝ տեղեկությունների լրացուցիչ աղբյուր են: Հունահռոմեական որոշ տեղեկություններ նույնպես այլ մեկնաբանության հնարավորություն են ընձեռում:

Ավելորդ չենք համարում համառոտ անդրադառնալ վկայաբանությունների մատուցած պատմական նյութին: Սուրբ Ոսկյանք եւ Սուքիասյանք առաջին քրիստոնյաներից են, որոնք հավատքի համար նահատակվել են Հայաստանում: Ոսկյանք հինգ դեսպաններ էին՝ հռոմեական կայսեր կողմից ուղարկված հայոց Սանատրուկ թագավորի մոտ⁴: Հայաստանում նրանք դարձել են Սուրբ Թադեոս առաքյալի հետեւորդները, իսկ Սանատրուկ թագավորի կողմից առաքյալի նահատակությունից հետո ճգնակյաց ապրել են Եփրատի ակունքների մոտ գտնվող լեռներում, որոնց շրջակայքը Ծաղկե վայրի անունով հետագայում կոչվել է Ծաղկոտն⁵: Նրանք Ոսկյանք (Ոսկյաններ) են կոչվել իրենց գլխավորի՝ Խոյունսի կամ Խոյունոսի անունով, որը հունարեն նշանակում է «ոսկի»⁶: Ոս-

ժողովրդական առասպելները Մովսես Խորենացու պատմության մեջ, Երկեր, հտ. Ը., 1985, էջ 163—197. Հ. ՄԱՆԱՆԿՅԱՆ, Քննական տեսություն հայ ժողովրդի պատմության, Երկեր, հտ. Ա., Երեւան, 1977, էջ 128—138, 344—345, հտ. Բ., Երեւան, 1978, էջ 16—18. Գ. ՍԱՐԳՍՅԱՆ, Հելլենիստական դարաշրջանի Հայաստանը եւ Մովսես Խորենացին, Երեւան, 1966, էջ 139—241. Նույն հեղինակի՝ «Նախամեսրոպյան շրջանի հայ պատմագրությունը», ՊՐՀ, 1969, թիվ 1, էջ 107—126. ՄԱՂԱՔԻԱ ԱՐՔ. ՕՐԽԱՆԵԱՆ, Ազգապատում, հտ. Ա., Ս. էջմիածին, 2001, սյուն 17—20. ԵՋՆԻԿ ԿՐԳ. ՊԵՏՐՈՍՅԱՆ, Հայ եկեղեցու պատմություն, մաս Ա., Ս. էջմիածին, 2000, էջ 16. «Հայ ժողովրդի պատմություն», ՀՍՍՀ ԳԱ հրատ., հտ. Ա., Երեւան, 1971, էջ 531—538 եւ 762—763. «Հայ ժողովրդի պատմություն», ԵՊՀ հրատ., Երեւան, 1975, էջ 112—116. «Հայ ժողովրդի պատմություն», ԵՊՀ հրատ., Երեւան, 2012, էջ 47—48, 63 եւ այլն:

⁴ «Լիակատար վարք եւ վկայաբանութիւն», հտ. Բ., էջ 121:

⁵ Ծաղկոտն, Ծաղկեոտն, Ուտն Ծաղկեոյ գավառը պատմական Հայաստանի Այրարատ նահանգի գավառներից է՝ տարածված Արեւելյան Եփրատի՝ Արածանիի վերին ավազանում: Գավառի հարավում՝ Ծաղկանց, հյուսիսում Դիաղինի լեռներն են: Դիւսավոր քաղաքն էր Զարհավանը:

⁶ Խոյունոս անվան լատիներեն իմաստային համարժեքը Հ. Ղ. Ալիշանը համարում է Ավրելիոս անունը (լատ.՝ aurus—ոսկի, aureus—ոսկյա. տե՛ս «Արշալոյս քրիստոնէութեան Հայոց», Վենետիկ, 1901, էջ 60): Ոսկյանց վկայաբանության նշումը, թե Խոյունոսը «ազգաւ գոիկ» էր («Սոփիք», ԺԹ., էջ 60), կարելի է հասկանալ, որ պատկանում էր զինվորական դասին: Լատիներեն gregalis նշանակում է հասարակ, նաեւ՝ զինվորական («Большой латин.-рус. словарь», <http://linguaeterna.com/vocabula/search.php>), իսկ «ազգ» բառը զրաբարում ունի նաեւ դաս, սեռ, տեսակ իմաստները («Նոր բառգիրք հայկազեան լեզուի», հտ. Ա., Վենետիկ,

կյանք քարոզել եւ քրիստոնեական հավատքի են կոչել հայոց Արտաշես թագավորին՝ Սանատրուկի որդուն։ Նրանց ունկնդրելով՝ վերջինս ասել է, որ քրիստոնեության մասին շատերից է լսել, բայց այս հարցով զբաղվելը հետաձգել է՝ պատերազմի շտապելով արեւելքում։ Ոսկյանք քարոզել են նաեւ հայոց արքունիքում, թագուհուն՝ Սաթենիկին, արքայազուններին։ Նրանք քարոզչության մեր Տեր Հիսուս Քրիստոսին հավատացել ու մկրտվել են Սաթենիկի հետ Հայաստան եկած նրա ազգակիցները՝ ալան զորավարները։ Իրենց գլխավորի՝ մկրտության մատցած Սուքիաս անունով նրանք կոչվել են Սուքիասյանք (Սուքիասյաններ)։ Տեղեկանալով, որ ալան զորավարները քրիստոնյա են դարձել, Արտաշեսի եւ Սաթենիկի կրտսեր որդիները՝ անվանված Վնոյն եւ Վրդոյն (կամ Վրոյն), այլ օրինակով՝ Վնոյն եւ Ջրոն, համախոհ դարձնելով իրենց ավագ եղբայր Արտավազդին՝ փորձում են Սուքիասյանց հետ դարձնել նախկին կռապաշտ հավատքին։ Մերժում ստանալով նրանցից՝ արքայազունները չարչարում են Ոսկյանց, որպեսզի նրանք տարհամոզեն իրենց աշակերտներին։ Վերջիններս պատասխանում են, որ Սուքիասյանք իրենք են ընտրել իրենց համար բարին։ Հայոց արքայազունները, խնայելով մոր կողմից իրենց ազգակիցներին, հրամայում են գլխատել Սուրբ Ոսկյանց։ Նրանց նահատակությունը տեղի է ունեցել Ք. հ. 107 թ. իրենց բնակության վայրում՝ Ծաղկոտն գավառի լեռներում, որտեղ ճգնել էին ավելի քան 43 տարի, քանի որ իրենց ճգնության 43-րդ տարում են մկրտել Սուրբ Սուքիասյանց⁷։

Սուրբ Ոսկյանց նահատակությունից հետո Սուրբ Սուքիասյանք, զրկված լինելով նաեւ իրենց ազգակից Սաթենիկ թագուհու բարեհաճ

1836)։ Որ այստեղ «ազգ»-ը հենց դաս իմաստով պետք է հասկանալ, երբեում է այլ օրինակում Ոսկյանց տրված բնորոշումից՝ որպես «ազնուականք, արքունի պաշտօնեայք, ազգաւ հռոմք կամ հռոմք» («Լիակատար վարք եւ վկայաբանութիւն», հտ. Բ., էջ 121), իսկ «ազգաւ գոիկ»-ի փոխարեն մի տեղ հանդիպող «ազգաւ գոեհիկ»-ը ցույց է տալիս, որ թարգմանիչն օգտագործել է gregalis բառի «հասարակ» իմաստը, սակայն հռոմեական դեսպանի համար տեղին է բառի «զինվորական» իմաստը։ Հռոմում Ավրելիոս անունը (=Խոլուսոս, =Ոսկի) կրել են անդամները գաղիական ծագումով մի ընտանիքի, որին պատկանում էր նաեւ Անտոնինոս Պիոս (Բարեպաշտ) կայսրը, որը գահակալել է Բ. դարում եւ դասվում է Անտոնինոսների շարքին, քանի որ որդեգիրն էր Ադրիանոս կայսեր։ Թեպետ ուղղակի կռվան չկա պնդելու, բայց Խոլուսոսի համար նշված հռոմեական դեսպան եւ զինվորական լինելու հանգամանքը հավանական է դարձնում նրա պատկանելությունն այդ ընտանիքին՝ նկատի առնելով, որ ծագումով գաղիացիները կայսրությունում իրենց ուղին պետք է սկսած լինեին զինվորությունից։

⁷ Տե՛ս «Լիակատար վարք եւ վկայաբանութիւն», հտ. Բ., էջ 127 եւ 95. ՀՈՎՀԱՆՆԵՍ ԴՐԱՍԽԱՆԱԿԵՐՏՅԻ, Հայոց պատմություն, Երեւան, 1996, էջ 38, 40 (գրբ.), 39, 41 (աշխրհբ.)։

վերաբերմունքից, հեռանում են արքունիքից եւ միայնակյաց ապրում սկզբում Ոսկյանց ճգնավայրում, ապա՝ Բագրեւանդ գավառում⁸՝ Նպատ լեռան դիմաց՝ Զրաբաշխ անվանված լեռներում, որոնք, համաձայն վկայաբանության, հետագայում Սուբհասյանց անունով կոչվել են Սուկավետ։ Տարիներ անց ալանների նոր՝ Դադիանոս (կամ Գիգիանոս) թագավորը լսելով, որ ազգություն մը ալան իշխանները Հայաստանում ապրում են անծանոթ հավատքով, զորավար է ուղարկում Հայաստան՝ նրանց գտնելու եւ վերադարձնելու հրահանգով։ Բառլահան (կամ Բարուխայել) անունով այս զորավարը Հայաստանում գտնում է Սուրբ Սուբհասյանց եւ զարմացած նրանց ճգնակեցության վրա՝ հարցնում, թե ովքեր են։ Սուրբ Սուբհասյան իր մասին պատմում է, որ նախապես կոչվել է Բարաքաթրա, եղել է ալանների Շապուհ արքայի նիզակակիցը՝ երկրում երկրորդ գահն ունեցող իշխան⁹։ Բառլահան փորձում է համոզել նրանց թողնել քրիստոնեությունը, վերադառնալ հայրենիք, որտեղ կհաստատվեն նախկին դիրքում ու պատվի մեջ։ Մերժում ստանալով՝ նա տանջանքների է մատնում սրբերին եւ ապարդյուն ջանքերից հետո հրամայում սպանել։ Վկայաբանության համաձայն՝ Սուրբ Սուբհասյանք նահատակվել են 130 կամ 140 թթ.¹⁰։

Սուրբ Ոսկյանց վկայաբանությունը նշում է, որ Սուբհասյանները Զրաբաշխ լեռներում ճգնել են 46 տարի, նրանցից սպանվել են մոտ տասնհինգը, թաքնվելով փրկվել երկուսը¹¹։ Սուրբ Սուբհասյանց վկայաբանությունում նրանց ճգնության ժամանակը նշված է 44 տարի, Սուբհասյանք անվանապես հիշված են տասնինը, որոնցից երկուսը՝ փրկվածները¹²։ Վերջիններս, տեղափոխվելով քիչ հեռու մի վայր, հետո վերադարձել եւ կոթող են կանգնեցրել ընկերների նահատակության տեղում, քանի որ սպանողները նրանց մարմինները նետել էին ձորը։ Տարիներ անց վախճանվել են նաեւ նրանք, եւ մարմինները գտնողները թաղել

⁸ Բագրեւանդը Այրարատ նահանգի գավառներից էր՝ տարածված Արեւելյան Եփրատի՝ Արածանիի եւ Արաքսի ակունքների շրջանում, գլխավոր քաղաքն էր Բագարանը։

⁹ Տե՛ս «Լիակատար վարք եւ վկայաբանություն», հտ. Բ., էջ 100. «Հայկական վարքեր եւ վկայաբանություններ V–XV դդ.», էջ 221. «Սոփերք», ԺԹ., էջ 41. «Յայսմաւորք», էջ 119։

¹⁰ Տե՛ս «Լիակատար վարք եւ վկայաբանություն», հտ. Բ., էջ 109։

¹¹ Տե՛ս «Սոփերք», ԺԹ., էջ 63–64. «Հայկական վարքեր եւ վկայաբանություններ V–XV դդ.», էջ 215։

¹² Տե՛ս «Լիակատար վարք եւ վկայաբանություն», հտ. Բ., էջ 91. «Սոփերք», ԺԹ., էջ 55. «Հայկական վարքեր եւ վկայաբանություններ V–XV դդ.», էջ 229. «Յայսմաւորք», էջ 15։

են տեղում: Կարճ ժամանակ անց մոտակայքում հայոց Վաղարշ Թագավորը կառուցել է Վաղարշակերտ քաղաքը¹³:

Ոսկյանց վկայաբանության «Սոփերք»-ի տարբերակում նշված է սկզբնաղբյուրը: Հեղինակն ասում է, որ Հունաստանում («ի կողմանս Յունաց») գտել է Տատիանոսի ճառերի մի գիրք, որից վերցրել է Սուրբ Ոսկյանց եւ Սուրբիասյանց մասին պատմությունը¹⁴: Տատիանոսը քրիստոնյա ջատագով հեղինակներից է, ենթադրվում է, որ ծագումով Ասորիքից (Սիրիա) էր, ապրել եւ գործել է Բ. դարում (մահն ընդունվում է 185 թ.): Հռոմում եղել է Հուստինոս վկայի աշակերտներից, հայտնի է, որ շատ է շրջագայել, կյանքի վերջում տեղափոխվել է Արեւելք: Հեղինակն է «Դիատեսարոն»-ի (որում համադրաբար շարադրել է չորս Ավետարանների նյութը) եւ այլ գործերի, որոնց մասին հիշատակում են Սուրբ Կղեմես Ալեքսանդրացին (Բ.—Գ. դ.), Եւսեբիոս Կեսարացին (Գ.—Դ. դ.), իսկ Սուրբ Հերոնիմոսի համաձայն (Դ.—Ե. դ.)՝ «Տատիանոսը գրել է անհամար թվով գրքեր»¹⁵: Ջատագով հեղինակը, փաստորեն, հավաքել եւ իր ճառերում օգտագործել է նաեւ քրիստոնեական նահատակների վարքեր: Տատիանոսին մոտ 30 տարի է բաժանում Սուրբ Սուրբիասյանց նահատակության ժամանակից: Սուրբ Ոսկյանց եւ Սուրբիասյանց վկայաբանություններին նա հավանաբար ծանոթացել է Հայաստանին հարակից Ասորիքում (գուցե եւ՝ Հայաստանում): Հայտնի է, որ արդեն առաքելական շրջանից քրիստոնեության տարածման իրադարձությունները, նաեւ նահատակությունների պատմությունները գրի էին առնվում հավատքի քաջալերության համար եւ պահվում քրիստոնեական համայնքներում, ինչպես եւ փոխանցվում այլ համայնքների¹⁶: Վկայաբանության նյութի

¹³ Հայոց Վաղարշ Բ. Արշակունի Թագավորը՝ գահակալած Ք. հ. 186—196 թթ., ըստ Մովսես Խորենացու՝ 191—211 թթ.: Վաղարշակերտ քաղաքի անունն աղավաղված՝ Ալաշկերտ ձևով տարածվել է շրջակա դաշտավայրի վրա:

¹⁴ Տե՛ս «Սոփերք», ԺԹ., էջ 59. «Հայկական վարքեր եւ վկայաբանություններ V—XV դդ.», էջ 213. «Լիակատար վարք եւ վկայաբանութիւն», հտ. Բ., էջ 129, ծանոթ. 2:

¹⁵ Иероним Стридонский, О знаменитых мужах, гл. 29. «Подвижники. Избранные жизнеописания и труды», Книга вторая, Самара, 1999, с. 195.

¹⁶ Այդ մասին հնագույն հիշատակություններից մեկը պահպանվել է «Աղդայի վարդապետության» ասորերեն օրինակում, որտեղ ասվում է, որ Երուսաղեմի առաջին եպիսկոպոս Հակոբոս առաքյալը (Տյառնեղբայրը՝ նահատակված Ք. հ. 62 թ.) գրի առավ Քրիստոսի Խաչափառը գտնելու իրադարձությունները եւ ուղարկեց մյուս առաքյալներին, ինչպես եւ առաքյալները «տեղյակ էին պահում, թե ինչ արեց Քրիստոս իրենց միջոցով» (ռուսերենը տե՛ս Е. МЕЩЕРСКАЯ, Легенда об Абраге, Москва, 1984, էջ 188—191, նույն հեղինակի՝ «Апокрифические деяния апостолов, Москва», 1997, էջ 83—87): Կլավդիոս Ա. կայսեր

նախնական՝ հին շերտի մասին է խոսում Բարլահա (կամ Բարուխայել) անվանը տրված «դրախտ Աստծու» բացատրությունը¹⁷, որը պահպանվել է «Յայսմաուրքի» տարբերակում, նաեւ՝ Քոյուսի կուռքի մասին տեղեկությունը, որ մնացել է Թովմա Արծրունու երկում¹⁸:

Սուքիասյանց մասին մեր պատմիչներից առաջինը հիշատակում է Թովմա Արծրունին, սակայն սա չի նշանակում, որ մինչեւ Թ. դարավերջ Սուքիասյանց եւ Ոսկյանց վկայաբանությունները հայերեն գոյություն չեն ունեցել: Սրբոց վարքերի՝ իբրեւ պատմական գործերի առկայության պայմաններում պատմիչները միշտ չէ, որ պարտավորված են զգացել կրկնել դրանց նյութը եւ կամ հիշատակել են համառոտ: Ղեւոնդ Ալիշանի կարծիքով՝ Սուրբ Ոսկյանց եւ Սուքիասյանց մասին Մովսես Խոբենացին «Հայոց պատմության» մեջ չի հիշատակում, քանի որ նրանց վկայաբանությունները հայերեն ինքն է առանձնացված շարադրել ըստ Տատիանոսի¹⁹: Ոսկյանց մասին անուղղակի հիշատակություն է Փավստոս Բուզանդի այն տեղեկությունը, որ Գինգ վարդապետը (Գ. դարավերջ) ճգնակյաց ապրում էր Եփրատի ակունքներում, որտեղ ճգնել էր նաեւ Գրիգոր Լուսավորիչը, եւ վայրը կոչվում էր Ոսկիք²⁰: Սրբերին հա-

որոք (Ք. հ. 41—54 թթ.) Տիրոջ Խաչափայտի գյուտի մասին պատմող այս հատվածը հայերեն օրինակում չկա, սակայն լիարժեք համապատասխանությամբ առկա են Խաչափայտի պատմությունից վերեւ եւ ներքեւ եղող նախադասություններն ու միտքը, որ «Հակոբոսը՝ Երուսաղեմի եկեղեցու առաջնորդը, որ իր աչքով էր տեսել այս դեպքերը, գրեց եւ տվեց տանելու իր ընկեր առաքյալներին՝ բոլորին աշխարհում եւ քաղաքներում, որ շրջակայքում էին: Եւ նրանք իսկ՝ առաքյալները, ընկերակիցները նրա, գրում եւ ցույց են տալիս նրան՝ Հակոբոսին, ամենը, ինչ կատարում էր Քրիստոս նրանց ձեռքով. եւ ընթերցում ու պատմում էին ժողովրդի առաջ» (գրք. փոխադր.՝ հեղինակի). տե՛ս ՂԵՐՈՒԲԵԱՆ ԵՂԵՍԱՅԻ, Թուղթ Աբգարու թագաւորի հայոց եւ քարոզութիւն Սրբոյ Թադէի առաքելոյ, Երուսաղէմ, 1868, էջ 13: Սա ցույց է տալիս, որ Տիրոջ Խաչափայտի գյուտի պատմությունը Սուրբ Թադէոսի քարոզության («Ադդայի վարդապետության») հայերեն օրինակում նախապես եղել է նույն տեղում: Այն, հավանաբար, առանձնացրել են Սուրբ Խաչին նվիրված տոնին ավելի հարմար ձեւով օգտագործելու նպատակով: «Յայսմաուրքում» այն ներառված է Վարագա Սուրբ Խաչի տոնի ներքո՝ որպէս նախապատմություն Սուրբ Հռիփսիմեի կողմից Խաչափայտի մասունքի Հայաստան բերվելու եւ Վարագա լեռան վրա պահելու պատմության (տե՛ս «Յայսմաուրք», էջ 46դա):

¹⁷ Տե՛ս «Յայսմաուրք», էջ լր: Բար-ռախ-էլ բառամասերը տարբերակելով՝ ավելի ճիշտ է՝ «պտուղ (կամ որդի) դրախտի Աստծու»:

¹⁸ Տե՛ս ԹՈՎՄԱ ԱՐԾՐՈՒՆԻ, Պատմութիւն տանն Արծրունեաց, դպր. Ա., գլ. Ը., Կ. Պոլիս, 1852, էջ 57—58, աշխրհ.՝ Երեւան, 1978, էջ 75:

¹⁹ Տե՛ս Ղ. ՎՐԳ. ԱԼԻՇԱՆ, Արշարղյս քրիստոնէութեան Հայոց, Վենետիկ, 1901, էջ 66:

²⁰ Տե՛ս ՓԱՎՍՏՈՍ ԲՈՒԶԱՆԳ, Հայոց պատմություն, դպր. Զ., գլ. ԺԶ., Երեւան, 1987, էջ 414 (գրք.), էջ 415 (աշխրհ.):

մառոտ հիշում է նաեւ Հովհաննէս Դրասխանակերտցին²¹ (Ժ. դ.)՝ նշելով, որ Ոսկյանք Սուբիասյաններին մկրտել են իրենց քարոզչության 43-րդ տարում: Թովմա Արծրունին նույնպէս համառոտ է հիշատակում, որ Սուբիասյանք՝ Սաթենիկ թագուհու համերկրացիները, քարոզել են արքունիքում, բայց Սաթենիկը չի հրաժարվել Աստղիկի պաշտամունքից: Այս հիշատակությունն էլ ծնունդ է առնում խոսքի բերումով, երբ նա ընդարձակ պատմում է Արտաշեսի կողմից Վանա լճի արեւելյան կողմում Արտամատ (Արտամետ) քաղաքի կառուցման, այնտեղ Աստղիկի արձանը կանգնեցնելու եւ քաղաքը Սաթենիկին նվիրելու մասին: Սուբիասյանց վերաբերյալ համառոտ պատմելով հանդերձ՝ Թովմա Արծրունին պահպանել է ուշագրավ հիշատակություն այն մասին, որ Սուբիասյանք իրենցից մեկին ուղարկեցին (պետք է ենթադրել՝ Արտամատ) բացատրելու, որ անտեղի եւ սին է Քոյուսի կուռքի պաշտամունքը: Եթե պատմիչի աղբյուրը Սուրբ Սուբիասյանց նախնական վկայաբանությունն է, ապա ենթադրելի է, որ այն բավական ընդարձակ է եղել: Եւ իրոք, Տատիանոսի ճառերը պարունակող մատյանի մասին այն թարգմանողը (կամ ըստ այդմ շարադրողը) հայտնում է, որ այդտեղ գրվածի վերաբերյալ «անթիւ շատաբանութեամբ» (առատախոսութեամբ) գրույցներ գոյություն ունեն նաեւ Հայաստանում²²: Դրանք պետք է որ պահպանված լինեին նաեւ գրավոր, եթե Թովմա Արծրունին դարեր անց օգտագործել է՝ հաղորդելով Արտամատի կառուցման եւ Քոյուսի կուռքի մասին, որի պաշտամունքը Սուբիասյանք հորդորել են անիմաստ համարել՝ դիմելով ինչպէս իրենց ազգակից Սաթենիկ թագուհուն, ում նվիրված էր քաղաքը, այնպէս եւ վերջինիս բնակիչներին:

Ինչ վերաբերում է կուռքի անվանը, կարծում ենք, որ այն Քոյուսի=Խոյուսի է կոչված ոսկուց պատրաստված լինելու պատճառով եւ նվիրված է եղել Աստղիկ աստվածուհուն, որի արձանը կանգնեցված էր Արտաշեսի նորակառույց Արտամատ քաղաքում: Աստղիկին նվիրված ոսկե կուռքի անունը Ոսկյանց գլխավորի՝ Խոյուսիի անվան հետ կապ ունի այնքանով, որքանով երկուսն էլ բխում են հունարեն «ոսկի» բառից:

²¹ Տե՛ս ՀՈՎՀԱՆՆԵՍ ԴՐԱՍԽԱՆԱԿԵՐՏՅԻ, Հայոց պատմություն, էջ 38, 40 (գրբ.), 39, 41 (աշխրհբ.):

²² Տե՛ս «Սոփերք», ԺԹ., էջ 59: Այստեղ Տատիանոսի գործունեությունը նշված է Վաղենտինիանոս, այլ օրինակում՝ Հուստինիանոս կայսեր օրոք, որը Ղ. վրդ. Ալիշանն ուղղում է Հուստինոսի՝ նկատի ունենալով Տատիանոսի ուսուցիչ Սուրբ Հուստինոսին (տե՛ս «Արշալոյս քրիստոնէութեան Հայոց», էջ 60 եւ 67):

Հայտնի է, որ մինչ այդ հայոց թագավորները պղնձե-ոսկեպատ կուռքեր էին բերել հելլենիստական քաղաքներից: Հայաստանում նույնպես ձուլվում էին հեթանոս աստվածների արձաններ²³: Վկայաբանության հեղինակը, քրիստոնյա լինելով, կարեւորություն չի տվել, թե որ աստվածությունն է նվիրված հիշյալ կուռքը, որն իր համար շաստվածություն էր՝ պարզապես նյութ, եւ անվանել է ըստ նյութի՝ Քոյուսի (Խոյուսի) կուռք, այն է՝ Ոսկե կուռք: Սա ցույց է տալիս, որ վկայաբանությունը նախապես գրվել է հունարեն եւ ենթադրելի է՝ սրբերի նահատակությունից շատ չանցած, եթե երեք տասնամյակ անց այն օգտագործել է Տատիանոսը: Կարելի է մտածել, որ «Սուփերք»-ի օրինակը Տատիանոսի համառոտ շարադրածն է, իսկ ընդարձակը պահվել եւ շրջանառվել է առանձին, ներմուծվել է «Յայսմաւուրք», Ճառընտիրներ, եւ դրանց ծանոթ են եղել հայ պատմիչները: Վարքերն ու վկայաբանություններն իբրեւ պատմական գրվածքներ ընդունելով՝ պատմիչները, ինչպես ասացինք, չեն կրկնել դրանց նյութը, այլ հիշել են համառոտ՝ իրենց շարադրանքի հետ առնչված²⁴:

Այն, որ Սրբոց Ոսկյանց եւ Սուքիասյանց վկայաբանությունները գրի են առնվել նախքան Մաշտոցյան գրի ստեղծումը եւ հայոց պատմիչների հանդես գալը, հավաստում է նաեւ Սուքիասյանց վկայաբանության «Սուփերք»-ի օրինակում կատարված ընդմիջարկումը, որը ժամանակագրական հակասություն է բերել: Ինչպես դիտարկել է Հ. Մկրտիչ Ավգերյանը²⁵, հետագա ընդօրինակող կամ վերաշարադրող վարքագիծը շփոթել է ալանների Շապուհ թագավորին պարսից թագավոր Շապուհ Ա.-ի հետ: Վկայաբանության սկզբում ասված է, որ սրբերը խոտաճարակ դարձան Շապուհ թագավորի ժամանակ՝ առանց նշելու, թե ո՞ր երկրի Շապուհ թագավորի: Շարունակության մեջ եւ մյուս օրինակնե-

²³ Այս մասին տե՛ս Բ. ԱՌԱՔԵԼՅԱՆ, Քանդակագործությունը հին Հայաստանում, ՊԲՀ, 1969, թիվ 1, էջ 52–67:

²⁴ Պատահական չէ, որ Փավստոս Բուզանդը «Հայոց պատմությունը» սկսում է Գ. դպրությանից (կամ գրքից)՝ հիմնավորելով, որ Հայաստանում Սուրբ Թադեոս առաքյալի քարոզության (Ա. դարի դեպքեր), նաեւ Սուրբ Գրիգոր Լուսավորչի եւ Սուրբ Տրդատ Գ. թագավորի գործունեության մասին (Գ. դարի դեպքեր) արդեն գրված են: Այսինքն՝ Սուրբ Թադեոս առաքյալի, նրա աշակերտների եւ, բնականաբար, ժամանակի արքաներ Սանատրուկի ու Արտաշեսի մասին վարքագրական գրականությունն ընկալված է Հայոց պատմության Ա. դպրություն, իսկ Սուրբ Գրիգորի եւ Սուրբ Տրդատի վերաբերյալ Ագաթանգեղոսի շարադրանքը (անշուշտ՝ նախնականը)՝ Բ. դպրություն:

²⁵ Տե՛ս «Լիակատար վարք եւ վկայաբանութիւն», հտ. Բ., էջ 113–114, ծանոթ. 2:

րում տեսանելի է, որ խոսքն ալանների Շապուհ թագավորի մասին է, որի նիգակակիցն էր Սուրբ Սուքիասը, ինչպես եւ ինքն ասում է Բառլահային²⁶: Հետագա ընդօրինակողը կամ վերաշարագրող վարքագիրը, Շապուհ անվանը հանդիպելով, շարադրանքը տեղափոխել է մեկ դար հետո եղած իրականություն՝ հիշատակելով պարսից Արտավան թագավորի սպանությունը (Ք. հ. 226 թ.), հայոց խոսքով թագավորի սպանությունը (Ք. հ. 252 կամ 259 թ.), պարսկական գործի արշավանքը Հայաստան, ժողովրդի նեղյալ վիճակը, եւ այս ժամանակավրեպ հավելումով միավորել վկայաբանության այն մասի հետ, թե Սուքիասյանք աղոթում էին Հայաստանի խաղաղության համար²⁷: Շփոթեցնողը, այսպիսով, Շապուհ անունն է, որը հասկացվել է պարսից թագավորի համար ասված (Շապուհ Ա.-ի՝ Ք. հ. 242—273 թթ. կամ 239—274 թթ.)՝ փոխարեն ալանների արքայի:

Հարկ է անդրադառնալ, որ հայոց խոսքով Մեծ թագավորի դավադրաբար սպանության դրվագներում հայ պատմիչների կողմից պարսից թագավորը հիշատակված է Արտաշիր անունով եւ միայն Ագաթանգեղոսի գործում՝ «պարսից թագավոր» ձևով²⁸: Նույնիսկ Հովհաննես Դրասխանակերտցին, որը հետեւելով Սուքիասյանց վկայաբանության մեջ մուծված հիշյալ շփոթմունքին, կարծում է, թե Սուքիասյանք նահատակվել են խոսքով Մեծի սպանությունից հետո, այնուամենայնիվ, վերջինիս սպանության դրվագում պարսից թագավորին Արտաշիր է կոչում՝ համաձայն իրեն նախորդած հայ պատմիչների:

Տվյալ պարագայում նույնիսկ էական չէ՝ արդյոք հայ պատմիչները Սասանյան Արտաշիր Ա.-ի (Ք. հ. 224—242 թթ. կամ 224—239 թթ.) իշխանության ժամանակաշրջանն են երկար պատկերացնում, թե՞ նկատի ունեն նրա թոռանը՝ խոսքով Մեծի սպանությունից հետո Հայաստանը նվաճած Որմիզդ-Արտաշիրին՝ Շապուհ Ա.-ի որդուն, որը նաեւ թագավոր կարգվեց

²⁶ Տե՛ս «Սոփերք», ԺԹ., էջ 34. «Հայկական վարքեր եւ վկայաբանություններ», էջ 217 եւ 221. «Յայամաւորք», էջ լր:

²⁷ Տե՛ս «Սոփերք», ԺԹ., էջ 37—41:

²⁸ Տե՛ս Ա.ԳԱՐԱՆԳԵՂՈՍ, Հայոց պատմություն, Բ., Երեւան, 1983, էջ 28 (գրբ.), 29 (աշխրհբ.). ՄՈՎՍԵՍ ԽՈՐԵՆԱՅԻ, Պատմութիւն Հայոց, գք. Բ., գլ. Կէ.—ՀԴ., Տփղիս, 1913, էջ 196—222, աշխրհբ.՝ Երեւան, 1990, էջ 134—146. ՂԱԶԱՐ ՓԱՐՊԵՅԻ, Հայոց պատմություն, գլ. Բ., Երեւան, 1982, էջ 8 (գրբ.), 9 (աշխրհբ.). ՀՈՎՀԱՆՆԵՍ ԴՐԱՍԽԱՆԱԿԵՐՏՅԻ, Հայոց պատմություն, էջ 40 (գրբ.), 41 (աշխրհբ.). ՍՏԵՓԱՆՈՍ ՏԱՐՈՆԵՅԻ, Պատմութիւն տիեզերական, հնդս. Ա., գլ. Ե., Ս. Պետերբուրգ, 1885, էջ 52. ՎԱՐԴԱՆ ԱՐԵՒԵԼՅԻ, Տիեզերական պատմություն, Երեւան, 2001, էջ 46 (գրբ.), 71 (աշխրհբ.):

Հայաստանում (Ք. հ. 261/262–272 թթ. կամ 260–274 թթ.)²⁹, իսկ այնուհետեւ Սասանյան գահին հաջորդեց հորը: Մեզ հետաքրքրող հարցում կարելուրն այն է, որ վկայաբանության մեջ հավելում կատարողը խոսքով Մեծի սպանության դեպքում՝ 250-ականներին պարսից արքային գիտի Շապուհ անվամբ (այսինքն՝ ճիշտ), մինչդեռ հայոց պատմիչները կամ Արտաշիր են կոչում նրան, կամ ուղղակի՝ պարսից թագավոր: Ակնհայտ է, որ վկայաբանության հետագա այդ ընդօրինակողը, որը շփոթել է ալան եւ պարսից Շապուհներին եւ ներմուծել հավելումը, անկախ է հայ պատմիչներից:

Այս իրողությունը ենթադրում է վկայաբանության սկզբնական օրինակի առավել նախնականություն եւ, բնականաբար, անկախություն հայոց պատմիչներից: Տեղին է նկատել, որ Սուբխասյանց վկայաբանությունը, հաղորդելով, որ սրբերը խոտաճարակ դարձան Շապուհ թագավորի ժամանակ, փաստորեն, ժամանակագրությունը նշել է ալանների արքա-

²⁹ Ս. Երեմյանը կարծիք է հայտնել, որ Մովսես Խորենացու Բ. գրքի ՀԶ. գլխում հիշված Արտաշիրը, որ գործել է Վալերիանոս կայսեր (253–260 թթ.) եւ նրան կարճատեւ գահակալությամբ հաջորդած Կլավդիոս Բ., Ավրելիանոս, Տակիտոս, Փլոտինոս կայսրերի շրջանում, չի կարող լինել Սասանյան Արտաշիր Ա.-ն, այլ՝ նրա թոռ եւ Շապուհ Ա.-ի որդի Որմիզդ-Արտաշիրը (տե՛ս Ս. ԵՐԵՄՅԱՆ, Նախշ-ի-Ռուստեմի «Քաաբ ի Զարդուշտ» հուշարձանի արձանագրության վկայությունները Հայաստանի մասին, ՊԲՀ, 1966, թիվ 2, էջ 66–67): Մովսես Խորենացին, սակայն, այս անձին հիշում է սկսած Բ. գրքի ՀԲ. գլխից, երբ պատմում է Փլիպոս Արաբացի կայսեր (244–249 թթ.) օրերից ի վեր Սասանյան Իրանի հարձակումների դեմ հայոց խոսքով թագավորի պայքարի եւ նրա դավադրաբար սպանության մասին: Ս. Երեմյանի դիրքորոշումը տարածելով նաեւ Մովսես Խորենացու Բ. գրքի ՀԲ.–ՀՆ. գլուխների վրա՝ արդարացված է մտածելը, որ Հայաստանի նվաճումը Շապուհ Ա.-ն հանձնարարել էր իր ավագ որդուն՝ Որմիզդ-Արտաշիրին, եւ նրա անունն է պահպանվել խոսքովի սպանության դեպքում: Ուշագրավ է, որ վրաց տարեգրության հայերեն թարգմանությունը, պատմելով վրաց թագավոր Ասպարազուրի կողմից հայոց թագավոր խոսքովին ցույց տված օժանդակության եւ հաջորդող դեպքերի մասին, խոսքովի սպանությունը նույնպես վերագրում է Սասանյան Քարսե-շարվանին կամ Արտաշիրին, որն այնուհետեւ գրավել է նաեւ Վրաստանը (տե՛ս ԶՈՒԱՆՆԷՐ, Համառօտ պատմություն վրաց. գլ. է., Վենետիկ, 1884, էջ 39–40): Անվան Քարսե-շարվան ձեւը վկայում է, որ տեղեկությունը բնագրային է, եւ հավանական է, որ հայոց եւ վրաց աղբյուրները նկատի ունեն Հայաստանն ու Վրաստանը նվաճած Որմիզդ-Արտաշիրին: Վրաց տարեգրության վրացերեն տարբերակում (Քարթլիս ցխովրեբա) Հայաստանն ու Վրաստանը նվաճած Սասանյանն անվանված է Քարսե հայերենի համառոտված ձեւով (թարգմ. տե՛ս Л. МРОВЕЛИ, Жизнь Картийских царей, Москва, 1979, էջ 37), մեկ այլ տարբերակում նա կոչված է խոսքով՝ ճշտումով, որ Արտաշիրն է: Այստեղ իբրեւ պատվանուն առկա Անուշիրվան անունը, անշուշտ, հետագա ներմուծում է՝ ծագած խոսքով Անուշիրվան արքայի (Զ. դ.) պատվանունից (տե՛ս «Кармлис цховребѣ», Тбилиси, 2008, էջ 37–38): Հարցն այն է, որ եւ Շապուհ Ա.-ն, եւ նրա որդիները՝ նաեւ Որմիզդ Արտաշիրը, որոնք թագավորել են նվաճած երկրներում եւ Իրանի տարբեր հատվածներում, կրել են նաեւ խոսքով պատվանունը, ինչպես վկայում է Շապուհ Ա.-ի Նախշ-ի-Ռուստեմի արձանագրությունը (տե՛ս A. MARICQ, Classica et Orientalia, “Syria”, 1958, v. 35, էջ 316–317, https://www.persee.fr/doc/syria_0039-7946_1958_num_35_3_5332):

յի միջոցով, ինչը հնարավոր է դարձնում մտածել, որ վկայաբանության նախնական օրինակը կարող էին գրել նահատակությունից փրկված երկու՝ ազգություն մի քան սրբերը, կամ այն գրի է առնվել ըստ նրանց պատմածի³⁰, մանավանդ որ վկայաբանության մեջ Սուրբիասյանները նշված են անվանապես, ներկայացված են երկխոսություններ, նահատակության մանրամասներ: Այսպիսով, առավել հավանական է, որ Տատիանոսն ունեցել է գրավոր սկզբնաղբյուր, որը պահվել է հայտնի է եղել հայ պատմիչներին: Հետագայում հավելվել է Դ. դարում Սուրբ Գրիգոր Լուսավորչի (302—325 թթ.) կողմից սրբերի նշխարները գտնելու, տեղում վանք կառուցելու եւ իր աշակերտներից Աբաս եպիսկոպոսին վանահայր կարգելու, նաեւ՝ Կոստանդիանոս Ա. կայսեր (305—337 թթ.) այցի եւ իր հետ մասունքներ տանելու մասին պատմող վերջավորությունը³¹:

Վկայաբանության անկախությունը հայ պատմիչներից էական դեր ունի տեղեկությունների գնահատման առումով: Էական է նաեւ, որ վկայաբանությունը նպատակ չունի ներկայացնելու հայոց պատմություն, այլ՝ սրբերի կյանքն ու նահատակության հանգամանքները, սակայն մատուցում է հարակից տեղեկություններ, որոնք կարեւոր են այլ տեղեկությունների հետ համագործելու համար:

Վկայաբանություններում նկարագրված դեպքերի ժամանակաշրջանը վերաբերում է Հայաստանում Սուրբ Թադեոս առաքյալի քարոզչության եւ նահատակության, նրան աշակերտած Սուրբ Ոսկյանց ճգնության առնվազն 43 եւ Ս. Սուրբիասյանց ճգնության 44 տարիներին: Ս. Թադեոս առաքյալի նահատակության տարին ուղղակիորեն ավանդված չէ, բայց Սուրբ Ոսկյանց նահատակության 107 թվականից դուրս բերելով նրանց

³⁰ Այսպես մտածել է նաեւ ընդօրինակող վարքագիծներից մեկը (արդյոք որերորդը). տե՛ս «Լիակատար վարք եւ վկայաբանություն», հտ. Բ., էջ 111—112:

³¹ Կոստանդիանոս Ա. կայսեր այցը Հայաստան Հ. Մ. Ավգերյանը կասկածելի է համարում. տե՛ս «Լիակատար վարք եւ վկայաբանություն», հտ. Բ., էջ 118—120, ծանոթ. 10: Այցի մասին հունահռոմեական տեղեկությունների բացակայությունը, սակայն, հարցը չի փակում. շատ հավանական է, որ Ե. դարում՝ Հնդհանրական եկեղեցու դավանաբանական բաժանումից հետո, Հայաստանից բերված սրբերի նշխարների մասին տեղեկությունները ժամանակի ընթացքում խմբագրվել-չնշվել են: Սրբերի նշխարների միմյանց փոխանցումը, սակայն, բնական, ընդունված եւ շատ տարածված էր եկեղեցու միասնականության առաջին դարերում, նաեւ Դ. դարի իրականության մեջ: Սուրբ Սուրբիասյանց նշխարները գտնող Ս. Գրիգոր Լուսավորչի եւ հայոց Տրդատ Թագավորը ժամանակակից են Կոստանդիանոս Ա.-ին: Անհավանական չէ, որ նահատակ սրբերի նորագույն նշխարներից մաս ունենալու կայսեր ցանկությանը նրանք ուրախությամբ ընդառաջել են՝ փոխանցելով մասունքները գուցե կայսերը, գուցե կայսեր ներկայացուցիչներին:

ճգնությունն առնվազն 43 տարին (երբ մկրտեցին Սուբխասյանց) կամ եւս 1—2 տարի՝ կարող ենք ընդունել, որ Արտազում Ս. Թադեոսի նահատակությունը տեղի է ունեցել Ք. հ. 60-ականների սկզբում (62 թ. կամ 63 թ.): Ոսկյանց նահատակությունից 44 տարի անց Սուբխասյանց նահատակությունը, սակայն, կստացվի ոչ թե 130 կամ 140 թ., ինչպես վկայաբանությունն է ավանդում, այլ մեկ տասնամյակ հետո՝ 150 թ.: Հավանական է, որ 130 կամ 140 թվական նշողն ընդօրինակելիս հանդիպել է գրի անհատակության եւ ենթադրաբար երկու տարեթիվ ցույց տվել: Ստորեւ կտեսնենք, որ Սուբխասյանք ողջ են եղել 140 թ. եւ հաջորդած մոտակա տարիներին, երբ պարթեական Վաղարշ Բ. թագավորն արշավանք է ձեռնարկել դեպի Հայաստան: Այս արշավանքի եւ դրա հետ կապված հանգամանքների հիշատակությունը Սուբխասյանց վկայաբանության մեջ ժամանակագրական հանգուցակետ է, որը նույնպես որոշակիացնում է Արտաշես թագավորի եւ նրա որդիների ապրած ժամանակաշրջանը:

ԱՐՏԱՇԵՍԻ ՈՐԴԻ ՏԻՐԱՆԻ ՄԱՍԻՆ

Սուբխասյանց վկայաբանության հաղորդմամբ՝ երբ պարթեական Պերոզ թագավորն արշավանք է ձեռնարկել դեպի Հայաստան, սրբերն աղոթել են երկրի խաղաղության համար, եւ պարսից արքան հետ է դարձել: Դեպքերի հանգամանքները նշված են հետեւյալ կերպ. երբ մահացել է հայոց արքա Արտաշեսը, մահացել է նաեւ պարսից արքան՝ «պարսից Արտաշեսը» (ստորեւ կտեսնենք, թե ով է այս թագավորը): Հայոց Արտաշեսին փոխարինել է որդին՝ Արտավազդը, պարսից Արտաշեսին՝ Պերոզը: Հայոց գահին Արտավազդին հաջորդել է Տիրանը՝ Արտաշեսի մյուս որդին, եւ նրա օրոք է Պերոզն արշավանք ձեռնարկել դեպի Հայաստան, քանի որ, ինչպես բացատրում է վկայաբանությունը, Հռոմի Անտոնինոս Պիոս կայսրը թագ եւ ծիրանի էր ուղարկել Տիրանին՝ հավատարիմ մնալու եւ հարկը վճարելու համար: Արշավանքի պատճառով նեղության մեջ հայտնված հայ ժողովրդի համար սրբերն աղոթել են, եւ Տերը, լսելով նրանց, «դարձրեց պարսից արքային այդտեղից իր երկիրը, քանի որ հասավ նրան պատգամը սպառնալիքների հռոմեացիների կայսրից, ում ապավինել էր հայոց արքան»³² (գրբ. փոխադր.— Ա. Ա.):

³² «Լիակատար վարք եւ վկայաբանութիւն», հտ. Բ., էջ 95—96:

Դեպի Հայաստան պարթեև թագավորի ձեռնարկած, բայց անավարտ մնացած այս արշավանքի մասին խոսում է նաև Անտոնինոս Պիոս (Բարեպաշտ) կայսեր (138–161 թթ.) վարքագիր Հուլիոս Կապիտոլինոսը (Գ. դար)՝ ասելով, որ «միայն նամակով կայսրը հետ պահեց պարթեևական թագավորին հայերի վրա հարձակումից»³³ (ռուս. թարգմ.— Ա. Ա.): Հուլիոս Կապիտոլինոսը չի նշում, թե պարթեևական որ թագավորի արշավանքն է կանխվել Անտոնինոս կայսեր նամակով, եւ երբ է դա տեղի ունեցել: Սա հնարավոր է դարձրել արշավանքի վերագրումը նաև Վաղարշ Գ.-ին (147/148–192)³⁴, որի իշխանության առաջին 14 տարիները նույնպես համընկնում են Անտոնինոս Պիոսի գահակալության հետ:

Հայագիտության մեջ դեպի Հայաստան պարթեևական արշավանքի եւ Անտոնինոս Պիոսի նամակով այն դադարեցնելու մասին Կապիտոլինոսի տեղեկությունը վերագրվում է Վաղարշ Բ.-ին (105–147 թթ.), իսկ արշավանքը համարվում է նախաձեռնված 140–143 թթ. միջեւ: Արշավանքի տարեթիվը որոշելու հիմք են դարձել Անտոնինոս Պիոս կայսեր՝ այդ տարիներին վերաբերող դրամները, որոնց վրա պատկերված է, թե ինչպես է կայսրը պսակ դնում հայոց թագավորի գլխին, եւ մակագրված՝ «տրվեց թագավոր հայերին՝ հրամանով Ծերակույտի»: Դրամների վրա պատկերված թագավորն ընդունված տեսակետով ենթադրաբար համարվում է հռոմեական աղբյուրներից ծանոթ Սոհեմոսը՝ հիշված պարթեևահռոմեական 161–166 թթ. տեղի ունեցած պատերազմի առնչությամբ, երբ հռոմեացիների կողմից կրկին բարձրացվեց հայոց գահին³⁵: Նա համադրվում է Արտաշեսի գահակալած 3-րդ որդու՝ Տիգրանի հետ, որի մասին Մովսես Խորենացին նույնպես ասում է, որ Անտոնինոս Պիոսի մահվան տարում, այսինքն՝ 161 թ. սկսված պարթեևահռոմեական պատերազմի արդյունքում Լուկիոս Վերոսի կողմից կրկին բարձրացվեց հայոց գահին³⁶: Սոհեմոսի կամ Տիգրանի այս երկրորդ գահակալությունը տեղի է ունեցել 164 թ., սակայն նրա

³³ Юлий Капитолин, Антонин Пий, IX, 6. տե՛ս «Властины Рима», Москва, 2006, էջ 548:

³⁴ Տե՛ս Н. Дибвойз, Политическая история Парфии, СПб, 2008, էջ 206. А. Бокщанин, Парфия и Рим, ч. II, Москва, 1966, էջ 265:

³⁵ Տե՛ս Հ. ՄԱՆԱՆԳՅԱՆ, Քննական տեսություն..., Երկեր, հտ. Բ., էջ 42–53. Ա. ԳԱՐԱԳԱՇԵԱՆ, Քննական պատմության Հայոց, էջ 259–260. Յ. ԱՍՏՈՐԻԱՆ, Քաղաքական վերաբերություններ..., էջ 114–124. «Հայ ժողովրդի պատմություն», ՀՍՍՀ ԳԱ հրատ., հտ. Ա., էջ 780–782. «Հայ ժողովրդի պատմություն», ԵՊՀ հրատ., էջ 63–64 եւ այլն:

³⁶ Տե՛ս ՄՈՎՍԵՍ ԽՈՐԵՆԱՅԻ, Պատմության Հայոց, գք. Բ., գլ. ԿԴ., էջ 196–198, աշխրհ.՝ 1990, էջ 127–128:

առաջին գահակալությունը ենթադրաբար 140–143 թթ. միջև ճանաչելու պատճառ չունենք, երբ գոյություն ունի Սուրբ Սուքիասյանց վկայաբանության ուղղակի տեղեկությունն այն մասին, որ Անտոնինոս Պիոս կայսրը թագ եւ ծիրանի է ուղարկել Տիրանին: Անտոնինոս Պիոսի դրամները համահունչ են վկայաբանության այս հաղորդմանը, եւ նրանց վրա պատկերված է Տիրանը, որի թագ ստանալը Հռոմից դարձել է Պերոզի՝ դեպի Հայաստան արշավանքի պատճառը: Ավելին՝ վկայաբանության մյուս հաղորդումը, թե Պերոզը հետ քաշվեց, երբ նրան հասավ կայսեր սպառնալիքը, հաստատում է Կապիտոլինուսը՝ ասելով, որ միայն նամակով Անտոնինոս կայսրը հետ պահեց պարթեւ թագավորին հայերի վրա հարձակումից: Սուրբ Սուքիասյանց վկայաբանության հաղորդածը, Անտոնինոս կայսեր դրամները եւ Կապիտոլինուսի տեղեկությունը միմյանց հետ այնքան ներդաշնակ են, որ ենթադրության տեղ չեն թողնում: Ըստ այդմ, առանց հայ պատմիչներին դիմելու, վկայաբանության եւ հռոմեական հիշյալ տեղեկություններով հայոց գահին 140–143 թթ. տեսնում ենք Արտաշեսի Տիրան որդուն: Տվյալ դեպքում էական է նաեւ, որ վկայաբանությունը նախորդում է հայ պատմիչների գործերին եւ անկախ է նրանցից:

ԱՐՏԱՇԵՍԻ ՈՐԴԻ ՏԻԳՐԱՆԻ ՄԱՍԻՆ

Հունահռոմեական աղբյուրների համաձայն՝ 161–166 թթ. պարթեւահռոմեական պատերազմի ժամանակ հետ մղելով Ասորիք հասած պարթեւական ուժերին՝ հռոմեացիները ներխուժել են նաեւ Հայաստան, եւ Սոհեմոսը Հռոմի կողմից բարձրացվել է հայոց գահին՝ կրկին թագավորելով³⁷: Ըստ Մովսես Խորենացու՝ նույն պատերազմի ժամանակ հայոց Տիգրան թագավորն ստիպված է եղել դաշնակցել պարթեւական թագավորի հետ եւ գերվել է հռոմեացիներից, իսկ հետո կայսերակից Լուկիոս Վերոսի կողմից կրկին բարձրացվել է հայոց գահին³⁸: Ակնհայտ է օտար աղ-

³⁷ Տե՛ս Юлий Капитолин, Марк Антонин Философ, IX, 1, Вер, VII, 1, «Властелины Рима», М., 2006, էջ 557 եւ 575. Кассий Дион, Римская история (книги LXIV–LXXX), LXXI, 3, 1, СПб, 2011, էջ 153–154. հմմտ. «Օտար աղբյուրները Հայաստանի եւ հայերի մասին», հտ. 9-րդ, ԴԻՈՆ ԿԱՍՍԻՆՍ, LXXI, 3, 1, Երեւան, 1976, էջ 215. Фотий, Мириобиблион, 94, Ямвлих, Вавилонская повесть, «Поздняя греческая проза», Москва, 1961, էջ 188. Հ. ՄԱՆԱՆԴՅԱՆ, Քննական տեսություն..., Երկեր, հտ. Բ., էջ 42–53. Յ. ՄԱՐԿԱՐՏ, էջ մը հալ Արշակունեաց հնագոյն պատմութենէն, «Հանդէս Ամսօրեայ», 1906, թիվ 2, էջ 37, ծանոթ. 3:

³⁸ Տե՛ս ՄՈՎՍԵՍ ԽՈՐԵՆԱՅԻ, Պատմութիւն Հայոց, գք. Բ., գլ. ԿԴ., 1913, էջ 196–198, աշխրհր.՝ 1990, էջ 127–128:

բյուրների եւ Մովսես Խորենացու հաղորդումների ներդաշնակությունը՝ բացառությամբ Սոհեմոս եւ Տիգրան անունների, այն է՝ նույն պատերազմի ժամանակ հռոմեացիների կողմից հայոց գահին է բերվում մեկը, որն այդ գահին բարձրանում է երկրորդ անգամ: Հակառակ տեղեկությունների այս ընդհանրությունը, ըստ ընդունված տեսակետի, Սոհեմոսը համարվում է էմեսայի (Հոմա) իշխանական տան ներկայացուցիչ, քանի որ այդ անունով Ա. դարում հիշված է էմեսայի վերջին թագավորը: Ենթադրվում է, որ Կապադովկիական թագավորական ընտանիքի հետ կապված էմեսայի իշխանական տունը կարող էր նաեւ հայ Արշակունիների հետ կապված լինել, եւ Սոհեմոսը, 164 թ. գահակալելով Հայաստանում, այստեղ է ստացել Տիգրան անունը: Հարց է ծագում՝ այդ դեպքում որտեղ է նախապես Սոհեմոսը թագավորել, եթե 72 թ. հետո էմեսայի թագավորությունը վերացված էր, իսկ Հայաստանում նրա գահակալությունը 164 թ. հիշված է որպես կրկին գահակալություն: Արդեն տեսանք, որ Սոհեմոսի առաջին գահակալությունը չի կարող կապվել Անտոնինոս Պիոսի կողմից հայոց թագավորին 140-ականների սկզբին թագ ուղարկելու՝ այդ կայսեր դրամներով մատնանշվող իրողության հետ, որովհետեւ այն, համաձայն Սուքիասյանց վկայաբանության, տրվել է Տիրանին: Կա նաեւ տեսակետ, որ 164 թ. եղել է Սոհեմոսի առաջին գահակալությունը, իսկ Տրդատ նախարարի ապստամբությունից հետո երկրորդը՝ 172 թ.³⁹: Ենթադրության կարիք, սակայն, չկա, երբ հարցի պատասխանը Մովսես Խորենացու երկում է. 161—166 թթ. պատերազմից հետո Հայաստանում Հռոմի կողմից կրկին գահ է բարձրացվել ոչ թե օտար մեկը, այլ հայոց թագավոր Տիգրանը, եւ հարկ է մտորել, թե ինչ հանգամանքներում է նա ստացել Սոհեմոս անունը:

161—166 թթ. պարթևահռոմեական պատերազմի եւ Հայաստանի հետ կապված դեպքերի առնչությամբ Մովսես Խորենացին հիշատակում է Մարկոս Ավրելիոս կայսերը գահակից, հռոմեական Արեւելքում կառավարիչ կարգված Լուկիոս Վերոսին, որը, ըստ պատմիչի, Հայաստան է ուղարկել պատերազմի սկզբում գերված հայոց Տիգրան թագավորին: Հռոմեական աղբյուրները Հայաստանի հետ կապված հիշում են զորավար Ստատիոս Պրիսկոսին, որը ներխուժել է Հայաստան եւ գրա-

³⁹ Հ. Դոդդի եւ Ա. Պրեմերշտայնի այս տեսակետի մասին տե՛ս Ռ. ՎԱՐԳԱՆՅԱՆ, Լուկիոս Վերոսի օրոք Հայաստանում թողարկված պղնձե դրամներ, ՊՐՀ, 2004, թիվ 2, էջ 246—247:

վել Արտաշատը, եւ նրան հաջորդած Մարտիրոս Վերոսին, որը գահին է բարձրացրել Սոհեմոսին (Տիգրանին): Մի դեպքում հիշատակված է կարգադրողը, մյուս դեպքում՝ կատարողները, որոնք ինքնակամ որեւէ մեկին իշխանության բերել չէին կարող, այլ առնվազն՝ Լուկիոս Վերոսի հանձնարարականով: Վերջնական որոշումը կայացրել է Մարկոս Ավրելիոս կայսրը, ինչպես հաղորդում է Կոռնելիոս Ֆրոնտոն՝ Մարկոս Ավրելիոսի եւ Լուկիոս Վերոսի ուսուցիչը, ասելով, որ նա «նախընտրեց Հայաստանում թագավորությունը հանձնել Սոհեմոսին, քան թե Վաղարշին, իսկ Բակուրին զրկեց թագավորությունից»⁴⁰: Մովսես Խորենացին, սակայն, լրացուցիչ պատճառ ունի հատկապես Լուկիոս Վերոսին հիշելու, քանի որ հաղորդում է, որ նա Տիգրանին կնության է տվել իր ազգական⁴¹ Ռոփիին (Ռուֆի): Ռոփիի որդիներից, որոնց Տիգրանը չցանկացավ արքայական Արշակունի ազգատոհմում գրանցել, սկիզբ է առել Ռոփյան նախարարական տունը, որը հետագայում հիշատակված է հայ մատենագրության մեջ, արձանագրված է հայկական նախարարական տները ներկայացնող «Գահնամակում», այդ տների ռազմական ուժերը ներկայացնող «Ջորանամակում», վավերագրեր, որոնք վերագրվում են՝ առաջինը՝ Ե. դարին, երկրորդը՝ է.⁴²: Դժվար թե Ե. դարում, երբ գրում էր Մովսես Խորենացին, Հայաստանում Ռոփյանները եւ այլք մոռացած լինեին Ռոփյանների՝ Բ. դարակեսին հայոց Արշակունի արքայական տանից սկիզբ առած լինելու մասին:

Սոհեմոսի՝ Արշակունի լինելու մասին ուղղակի վկայություն է Յամբլիկոս վիպագրի (Բ. դարավերջ) երկի հատվածը՝ պահպանված Փոտ (Փոտիոս) պատրիարքի (Թ. դ.) «Գրադարանում»: Ըստ այդմ՝ Յամբլիկոսը ծագվել է Սոհեմոսի օրոք, որը ա) Աբեմենյան Արշակունի է, թագավորել է՝ սերելով նույնպես թագավորած իր նախնիներից, բ) եղել է Հռոմի սենատի անդամ եւ հյուպատոս, գ) հետո կրկին դարձել է Մեծ Հայաստանի

⁴⁰ К. ТРЕВЕР, Очерки по истории культуры древней Армении, Москва—Ленинград, 1953, с. 236.

⁴¹ Մովսես Խորենացու օգտագործած «մերձավոր» բառը գրաբարում ունի նաեւ ազգակից, արյունակից իմաստը. տես ՆԲՀԼ, հտ. Բ., Վենետիկ, 1836, էջ 256:

⁴² Մովսէս ԽՈՐԵՆԱՅԻ, Պատմութիւն Հայոց, գր. Բ., գլ. ԿԴ., 1913, էջ 197, աշխրհբ.՝ 1990, էջ 127—128. ՂԱԶԱՐ ՓԱՐՊԵՅԻ, Հայոց պատմություն, էջ 204 (գրբ.), 205 (աշխրհբ.). ԵՊԻՇԵ, Վարդանանց եւ հայոց պատերազմի մասին, Երեւան, 1989, էջ 390 (գրբ.), 391 (աշխրհբ.). Ղ. ՎՐԳ. ԱԼԻՇԱՆ, Այրարատ, Վենետիկ, 1890, էջ 431—432. Н. АДОНЦ, Армения в эпоху Юстиниана, СПб, 1908, էջ 249—250. Բ. ՀԱՐՈՒԹՅՈՒՆՅԱՆ, Գահնամակի թվագրման հարցի շուրջ, ՊՐՀ, 1976, թիվ 2, էջ 57—72. Գ. ՍԱՐԳՍՅԱՆ, Մովսես Խորենացու նախարարական տոհմերի ցանկը, ՊՐՀ, 1996, թիվ 1—2, էջ 73—90:

Թագավոր⁴³։ Եթե կրկին է թագավորել Մեծ Հայքում, ապա բնական է նախ եւ առաջ մտածել, որ անցյալում նույնպես Մեծ Հայքի թագավորն էր, եւ, ինչպես ասված է, նրա նախնիներն էլ թագավորներ էին։ Յամբրիկոսի վեպը վերապատմող Փոտը չի որոշակիացնում, թե որտեղ են իշխել Սոհեմոսի նախնիները, բայց սա պատճառ չէ նրանց այլուր փնտրելու։ Կարծում ենք, որ Յամբրիկոսը ցանկացել է առանձնակի կարեւորությամբ խոսել Սոհեմոսի ու նրա տոհմի մասին, շեշտել է Աքեմենյանների եւ Արշակունիների կապը եւ նպատակադրված չի նշել, թե որ երկրում են իշխել Սոհեմոսի նախնիները, քանի որ Արշակունիները իշխել են մի շարք երկրներում, այդ թվում նաեւ Հայաստանում։ Այս կերպ վիպագիր հեղինակը մեծարել է Սոհեմոսի Արշակունի նախնիներին, որոնք իշխում էին ոչ թե մեկ, այլ մի քանի երկրներում, մեծարել է նաեւ Սոհեմոսին, որի օրոք ինքն ստեղծագործել է։ Այնուհետեւ, ծագումով Ասորիքից (Սիրիա)⁴⁴ Յամբրիկոսը երբեք չէր շրջանցի էմեսան, եթե Հայաստանի թագավոր Սոհեմոսը պատկաներ էմեսայի ասորական թագավորական տանը։ Ավելին՝ էմեսայի թագավորական տունը (Սամասիգերամյաններ) արաբական ծագումով ասորի հելլենականացած ընտանիք էր, որի հայտնի 7 իշխողներից 2-ը կրել են հենց Յամբրիկոս անունը։ Եւ եթե պետք է դատենք միայն անունով, ավելի հնարավոր է վիպագիր Յամբրիկոսի պատկանելությունը էմեսայի թագավորական տանը⁴⁵, ինչն ավելի կասկածելի է դարձնում, որ նա Սոհեմոսին, եթե վերջինս էմեսայի իշխող տանից լիներ, Արշակունի անվաներ։ Եթե էմեսայի իշխողներն ազգակցություն իսկ ունենային Արշակունիների հետ, Յամբրիկոսը, այնուամենայնիվ, նախ կնշեր Սոհեմոսի էմեսացի լինելը, այնինչ նա շեշտել է նրա՝ Արշակունի եւ Մեծ Հայքի թագավոր լինելը։

Իհարկե հարց է, թե ինչու է Մեծ Հայքի թագավորը որոշ ժամանակ Հռոմում սենատոր եւ հյուպատոս եղել։ Հավանական պատասխանը հու-

⁴³ Сѣн Фотій, Мириобиблион, 94, Ямвлих, Вавилонская повесть, «Поздняя греческая проза», Москва, 1961, էջ 188. Հ. ՄԱՆԱՆՅԱՆ, Քննական տեսություն..., Երևեր, հտ. Բ., էջ 42–43. Յ. ՄԱՐԿԱՐՏ, էջ մը հայ Արշակունեաց հնագոյն պատմութենէն, էջ 37, ծանոթ. 3:

⁴⁴ Փոտը վիպագիր Յամբրիկոսին բաբելոնացի է կոչում, սակայն համարվում է, որ նա ասորի էր՝ ծնված Ասորիքի Սգերիա քաղաքում, որոշ ժամանակ ապրել եւ ուսանել է Բաբելոնում. տե՛ս «Большая Российская Энциклопедия», <https://bigenc.ru/literature/text/4926529>:

⁴⁵ Վիպագիր Յամբրիկոսից մեկ դար հետո ապրած փիլիսոփա Յամբրիկոսի մասին հայտնի է, որ Ասորիքի Խալկիդա քաղաքից էր եւ ծագում էր նշանավոր ու հարուստ տոհմից, ենթադրվում է՝ էմեսայի քուրմ կառավարիչների ընտանիքից։ Յամբրիկոս անունն իսկ հունարեն հնդդությունն է արամերեն yu-mliku՝ «նա թագավոր է» արտահայտությամբ, որն իբրեւ անուն է կիրառվել (տե՛ս «Античная философия», Москва, 2008, էջ 837–848):

շում է Մովսես Խորենացու հաղորդածն այն մասին, որ 161 թ. Հռոմի Անտոնինոս կայսեր մահից հետո պարթևական Վաղարշ Բ. Պերոզի⁴⁶ պահանջով վերջինիս դաշնակցած հայոց թագավոր Տիգրանն արշավել է դեպի հռոմեական Ասորիք եւ Միջերկրաքի⁴⁷ կողմերում գերվել: Հայոց թագավորին ազատելու Կորդուքի զորաջոկատի փորձն անհաջողության է մատնվել:

Հռոմեացիների կողմից Տիգրանի գերեվարումը պատճառ է հանդիսացել, որ պարթևական թագավորը հենց պատերազմի սկզբում Հայաստանի գահին բարձրացնի նոր թագավորի՝ Բակուրին: Վերջինիս մասին հայտնող Ֆրոնտոի հիշյալ տեղեկությունը չի հակասում, այլ լրացնում է Մովսես Խորենացու պատմածը: Պարթև արքան իր գերված դաշնակցի փոխարեն Հայաստանում նոր թագավոր է կարգել:

Տիգրանի գերվելու (կամավոր թե ակամա), բայց ըստ էության Հռոմի կողմն անցնելու մասին Մովսես Խորենացու հաղորդածին ի նպաստ է նաեւ հռոմեական մեկ այլ տեղեկություն: Դիոն Կասսիոսի (Բ.—Գ. դ.) հաղորդմամբ՝ զորավար Ավիդիոս Կասսիոսն Ասորիք ներխուժած պարթևական թագավոր Վաղարշին քաջաբար դիմադրել է, եւ ի վերջո, քանի որ դաշնակիցները լքել են Վաղարշին, նրա նահանջելու ժամանակ հալածել եւ հետ է վանել մինչեւ Սելեկիա եւ Կտեսիփոն (Տիգրոն)⁴⁸: Այսինքն՝ պարթև թագավորի նահանջը մեծ չափով պայմանավորված է եղել նրա դաշնակիցների հեռանալով: Թեպետ պարթևական թագավոր Վաղարշին լքած դաշնակիցներն անվանապես հիշված չեն, այս հաղորդումը նույնպես համահունչ է Մովսես Խորենացու տեղեկությանը, թե Տիգրանը, սկզբում լինելով պարթևական թագավոր Վաղարշի դաշնակիցը, այնուհետեւ, ըստ էության, դաշնակից է դառնում Հռոմին եւ վերջինիս միջոցով կրկին հայոց գահին բարձրանում: Իրավամբ, ո՞ր պետությունը կարող էր լինել գլխավոր դաշնակիցը, երբ պատերազմում էին Հռոմեական ու Պարթևական տերությունները, եթե ոչ՝ նրանց միջեւ գտնվող Հայաստանը, որը, ինչպես պատմությունը բազմիցս վկայել է, ցանկության դեպքում իսկ չէր կարողանում չեզոք մնալ երկու հարեւան տերությունների գործերում: Այս դեպքում էլ հայոց թագավոր Տիգրանը, անհանգս-

⁴⁶ Ըստ Մովսես Խորենացու՝ Վաղարշ Բ. Պերոզը պատերազմի սկզբում մահացել է, եւ Հռոմի դեմ պատերազմը շարունակել է նրա որդին՝ Վաղարշ Գ.-ն:

⁴⁷ Միջերկրաք անվանվում էր երկու ծովերի միջեւ գտնվող Փոքր Ասիա թերակղզին, որը հարակից էր պատմական Հայաստանին:

⁴⁸ Sēs Cassii Dion, Римская история, LXXI, 2, 2—3, էջ 153, հմմտ. «Օտար աղբյուրները....», հտ. 9րդ, Դիոն Կասսիոս, LXXI, 2, 2—3, էջ 215:

տանալով պարթեական ներխուժումից իր երկիր, ստիպված է եղել միանալ Վաղարշ Բ.-ին եւ գերվել է հռոմեացիներից:

Հստ Կ. Տրեւերի՝ նա պահվել է հատկապէս Ասորիքում (Անտիոքում կամ մեկ այլ քաղաքում)⁴⁹: Այն, որ Սոհեմոս Տիգրանը 161–164 թթ. գտնվել է Ասորիքում՝ Հայաստանին մոտ, անուղղակի կերպով հաստատում է Դիոն Կասսիոսի հաղորդումը, որ պարթեւներին հետ մղելուց հետո Սոհեմոսին (Տիգրանին) Հայաստան վերադարձնելու համար հարակից Կապադովկիայի կուսակալ Մարտիոս Վերոսն է ուղեկցող զորաջոկատ ուղարկել Թուրքիոյ գլխավորութեամբ՝ ինքը եւս մտնելով Հայաստան⁵⁰: Հռոմում կամ կայսրութեան այլ՝ Հայաստանից հեռու վայրում Տիգրանի գտնվելու դեպքում ուղեկցողները Հայաստանին հարակից Կապադովկիայից չէին գնա:

Իրենց մոտ հայտնված հայոց թագավորին կնութեան տալով Ռոփին՝ կայսերակիցներ Լուկիոս Վերոսը եւ Մարկոս Ավրելիոսը նրան շնորհել են հյուպատոսի աստիճան (կոնսուլ) եւ ընդունել Սենատում: Սրանք մեծ շնորհներ չէին, որ տրվել են Մեծ Հայքի թագավորին: Բացի այդ՝ կոնսուլութունն այս շրջանում կորցրել էր նշանակութունը եւ առավելաբար պատվավոր կոչում էր, քան իրական իշխանութուն: Կայսրերը նույն տարվա համար նշանակում էին կոնսուլական մի քանի զույգերի՝ լրացուցիչ (suffekti) կոնսուլների, եթե ընտրված կոնսուլներն ինչ-որ պատճառով չէին կարող պաշտոնավարել, բայց նաեւ՝ նրանց հետ զուգահեռ: 161–164 թթ. համար ընտրված առաջին կոնսուլները պատմութեանը հայտնի են, հետեւաբար, Տիգրանը կամ Սոհեմոսը եղել է ոչ թե ընտրված կոնսուլ, այլ գահակից կայսրերից նշանակված սուֆեկտ լրացուցիչ կոնսուլ: Որքան էլ անվանական՝ կոնսուլական ժամկետը (1 տարի) լրացնելն իրավունք էր տալիս լինել կառավարիչ՝ կուսակալ որեւէ նահանգում (պրովինցիալում) կամ շրջանում: Կարծում ենք, որ կոնսուլութեան տարին լրանալուց հետո Տիգրանն իշխանութեան է կարգվել Հմեսայի շրջանում, որի վերջին թագավորը եւ կրել է Սոհեմոս անունը: Այդ անունն էլ Ասորիքում տրվել է Տիգրանին, եւ դա առանց հիմքի չէր: Մեկ դար առաջ Ներոն կայսրը, նախապատրաստվելով արեւելյան արշավանքի, 54 թ. Հմեսայի վերջին իշխան Սոհեմոսին էր հանձնել հայկա-

⁴⁹ Տէս Կ. ТРЕВЕР, Очерки по истории культуры древней Армении, էջ 235:

⁵⁰ Տէս Կ. КАССИЙ ДИОН, Римская история, LXXI, 3, 1, с. 154. *հմտ.* «Օտար աղբյուրներ...», հտ. 9-րդ, Դիոն Կասսիոս, LXXI, 3, 1, էջ 215:

կան Ծոփք նահանգի կառավարումը՝ այս առիթով շնորհելով նրան նաեւ թագավորի տիտղոս⁵¹։ Ոչ հեռու անցյալի այս հիշողությամբ Ասորիքում հայոց թագավոր Տիգրանին Սոհեմոս եւ կոչել, այսինքն՝ իրենց այն թագավորի անունով, որը, թեպետ կարճատեւ, իշխել էր նաեւ Հայաստանի մի մասում։ Տիգրանին տրված այդ անունն ավելի ընդունելի է եղել նաեւ հռոմեացիների համար, քանի որ էմեսայի վերջին թագավոր Սոհեմոսը հավատարմորեն ծառայել էր Հռոմին։

Կարծում ենք նաեւ, որ Տիգրանը, նախքան հայոց գահին բարձրանալը, եղբոր՝ Տիրանի օրոք եղել է հայոց արեւմտյան կողմնապահը՝ Ծոփքի բոլորքը, ինչպես հետագայում անվանվել է կողմնապահը (կուսակալ)։ Այդ պաշտոնում իրենց հոր գահակալության ժամանակ կարգված էր Տիրանը, ինչպես հաղորդում է Մովսես Խորենացին⁵², իսկ Տիրանի գահ բարձրանալուց հետո չի բացառվում, որ այն վարել է Տիգրանը։

Ահա այսպիսի առնչակցությամբ Ասորիքում Տիգրանն ստացել է Սոհեմոս անունը։ Հռոմեական աղբյուրներն այդ անունով են նրան հիշատակել՝ չորոշակիացնելով, սակայն, թե նա ով էր, մինչդեռ Ա. դարում ապրած Սոհեմոսի մասին նշում են էմեսայի թագավոր լինելը, թագավորի տիտղոսը՝ Ներոն կայսրից ստանալը, հիշում են Սոհեմոսի նախորդ, նրա եղբայր էմեսայի իշխան Ազիզին, նրանց հայր Սամասիգերամ Բ.-ին։ Սա եւս փաստ է՝ վկայող, որ հռոմեացիները գերադասել են լռության մատնել Սոհեմոս Տիգրանի հայ Արշակունի, Հայաստանի օրինական գահակալը լինելու իրողությունը՝ շեշտելու համար, որ նրան գահ բարձրացրին Հռոմի կայսրերը (ինչպես եւ արտահայտված է Մարկոս Ավրելիոսի եւ Լուկիոս Վերոսի 163—164 թթ. դրամներում)։

Հռոմեական սահմանում հայտնված Տիգրան թագավորին Ռոփիին կնություն տալը, Սենատի անդամ ճանաչելը, հյուպատոս (կոնսուլ) նշանակելը եւ Ասորիքի մի մասում իշխանության կարգելը քաղաքական ծրագիր էր, համենայն դեպս՝ գահակից կայսրերի մտածումը։ Պարթեական պատերազմը հաղթությամբ ավարտելու դեպքում, եթե հաջողվեր, Հայաստանը կարող էին հռոմեական նահանգ դարձնել, եթե ոչ՝ Տիգրանի

⁵¹ Sēs TAЦIT, Annales, kn. XIII, 7, «Сочинения», т. I, Ленинград, 1969, էջ 226։ Արշավանքը պարթեական թագավոր Վաղարշ Ա.-ի դեմ էր, որն իր եղբայր Տրդատին փորձում էր բարձրացնել հայոց գահին։ Ի վերջո, Տրդատ Ա.-ն դարձավ հայոց թագավոր, սակայն, Ներոն կայսեր համաձայնությամբ եւ նրանից թագ ստանալով։

⁵² Sēs ՄՈՎՍԵՍ ԽՈՐԵՆԱՅԻ, Պատմութիւն Հայոց, գք. Բ., գլ. ԾԳ., 1913, էջ 183—184, աշխրհը.՝ 1990, էջ 119։

հետ հայոց գահին կբարձրանար հռոմեացի թագուհի: Մեր այս կարծիքին նպաստում է Ֆրոնտոյի՝ Լուկիոս Վերոսին ուղղված նամակը, որից հայտնի է դառնում, որ Սոհեմոսի՝ հայոց գահին կրկին ընտրությունը Հռոմում տարակուսանք է առաջ բերել, թե ինչու է գերադասելի համարվել նա եւ ոչ՝ Վաղարշը, կամ ինչու է հեռացվել Բակուրը⁵³: Սա խոսում է այն մասին, որ Սոհեմոս Տիգրանը հայոց գահին վերադարձվել է իրավիճակի թելադրանքով: Նախ անդրադառնանք, որ հիշյալ Բակուրը եւ Վաղարշն առանց որեւէ հիմքի ենթադրվում են արքայազուներ պարթևական Արշակունիների ճյուղից, ինչը տարակուսելի է. դեռեւս շարունակվող պատերազմի պայմաններում հռոմեացիները կարո՞ղ էին հարմար նկատել իրենց նվաճած տարածքում թագավոր կարգել թշնամու ընտանիքի անդամին: Եթե պետք է ենթադրել, ավելի հավանական չէ՞ ընդունել, որ Բակուրը եւ Վաղարշը հայ Արշակունիներից են (օրինակ՝ Տիգրանի որդիները): Բայց ենթադրելու կարիք չկա, որովհետեւ կրկին կա Մովսես Խորենացու տեղեկություններին ներդաշնակող հռոմեական հիշատակություն: Հայտնի է, որ հիշյալ Բակուրը, 164 թ. գահազրկվելով եւ Հռոմ տարվելով, համաձայն եղբոր համար իր գնած դամբարանի արձանագրության, ընդունվել է կայսրական ընտանիք եւ կրել Ավրելիոս անունը⁵⁴: Այս փաստը կարող է բացատրվել նրա ազգակցության մեծ Տիգրանի հետ, որին, ըստ Մովսես Խորենացու, կայսերակից Լուկիոս Վերոսը կնության էր տվել իր մերձավոր Ռոփիրին: Նոր կնոջ միջոցով Սոհեմոս Տիգրանը դարձել է կայսերական տան անդամ, ինչպես եւ՝ նրա որդի Բակուրը: ԶԷ՝ որ սա ավելի համոզիչ բացատրություն է, քան այն, որ Հռոմին թշնամի Պարթևական տերության արքայական տան անդամ Բակուրն ինչ-ինչ ծառայության համար, որի մասին հիշատակություն չկա, ընդունվում է Հռոմի կայսերական ընտանիք:

Տիգրանի օրինակով նրա որդի Բակուրը նույնպես, ամենայն հավանականությամբ, պարթևական թագավորին լքողների թվում է եղել եւ Հռոմի համար մնացել որպես ընդունելի թեկնածու հայոց գահի համար: Բակուրի հայ Արշակունի լինելու մասին է խոսում նաեւ այն փաստը, որ երբ Արտաշատը նվաճած Ստատիոս Պրիսկոսը նրան հեռացրել է գա-

⁵³ Յ. ՄԱՐԿԱՐՏ, էջ մը հայ Արշակունեաց հնագոյն պատմութենէն, էջ 34. Հ. ՄԱՆԱԿՅԱՆ, Քննական տեսություն..., Երկեր, հտ. Բ., էջ 47:

⁵⁴ Տէս Կ. ԹՐԵՎԵՐ, Очерки по истории культуры древней Армении, էջ 238. Հ. ՄԱՆԱԿՅԱՆ, Քննական տեսություն..., Երկեր, հտ. Բ., էջ 49. Յ. ՄԱՐԿԱՐՏ, նշ. աշխ., էջ 38, ծանոթ. 2:

հից, Հայաստանում ապստամբություն է բռնկվել Տրդատ նախարարի գլխավորությամբ: Պրիսկոսին փոխարինած Կապադովկիայի կուսակալ Մարտիրոս Վերոսն ստիպված է եղել օգնության կանչել կայսրությանը հպատակ հենիոքների թագավորին, որին Տրդատը սպանել է: Հայաստան եկած Մարտիրոս Վերոսը դժվարությամբ է կարողացել հանդարտեցնել երկիրը՝ ոմանց համոզելով ու սիրաշահելով, ոմանց Հռոմի ուժով սպառնալով ու ճնշելով⁵⁵: Այդպիսի ապստամբություն Հայաստանում չէր բռնկվի պարթև արքայազնի հեռացման համար, այլ վստահորեն՝ հայոց արքայազնի: Նույնիսկ ապստամբությունը գլխավորած Տրդատին կայսրը չի հանձնարարել սպանել, ուղարկել է Բրիտանիա՝ անհանգստանալով Հայաստանում հնարավոր նոր հուզումներից:

Կ. Տրեւերն ապստամբության պատճառ է համարել Հայաստանը հռոմեական նահանգ դարձնելու հռոմեացիների փորձը⁵⁶: Այդ մասին կարելի է դատել Դիոն Կասսիոսի գործի հիշյալ հատվածի այն հաղորդումից, որ հռոմեացիներն Արտաշատի փոխարեն Նոր քաղաքը՝ լատիներեն Kaine polis-ը (այժմ՝ Վաղարշապատ) մայրաքաղաք դարձրին եւ այնտեղ հռոմեական կայազոր տեղակայեցին: Գտնված արձանագրությունները հաստատում են, որ հռոմեական կայազորն այստեղ ամրություններ է կառուցել: Ամեն դեպքում, հայոց թագավոր Բակուրին (պետք է ընդունել՝ Տիգրան Սոհեմոսի որդուն) հեռացնելու պատճառով բռնկված ապստամբությունը ստիպել է, որ Հռոմում գործուն քայլեր ձեռնարկեն Տիգրան Սոհեմոսին Հայաստան վերադարձնելու համար, որի միջոցով հայկական գահին կբարձրանար հռոմեացի թագուհի:

Գտնվել են նույն թողարկման պղնձե դրամներ, որոնցից մեկի (գտնված 2001 թ. Արտաշատում) վրա ընթերցվող գրության հիմքով Ռ. Վարդանյանը համարում է, որ այն հատվել է Լուկիոս Վերոսի գահակալության ժամանակ եւ պատկանում է հայոց թագավոր Տիգրան Սոհեմոսին: Դրամի դիմերեսին պատկերված է հայկական թագով արքայի կիսադեմը՝ թագուհու կիսադեմի հետ, իսկ դարձերեսին՝ երկգագաթ Արարատ լեռը: Ռ. Վարդանյանը կարծում է, որ 150-ամյա դադարից հետո դրամի թողարկումն Արշակունյաց Հայաստանում կարող էր կապված

⁵⁵ СЕУ КАССИЙ ДИОН, Римская история, LXXI, 3,1 եւ LXXII, 14, 2, էջ 154—155 եւ 165, հմմտ. «Օտար աղբյուրները...», հտ. 9րդ, Դիոն Կասսիոս, LXXI, 3,1 եւ LXXII, 14, 2, էջ 215, 216:

⁵⁶ СЕУ К. ТРЕВЕР, Очерки по истории культуры древней Армении, էջ 228—234:

լինել Հռոմի հետ դաշինքի վերահաստատման եւ Տիգրան Սոհեմոսի եւ Ռոփիի գահակալման հետ⁵⁷:

Պատահական չէ, որ Մովսես Խորենացին նույնպես Նոր քաղաքը՝ հռոմեական Kaine polis անունը, հիշատակում է 161–166 թթ. պարթեւահռոմեական պատերազմի դեպքերից անմիջապես հետո՝ ասելով, որ Տիգրանի որդի Վաղարշը (Վաղարշ Բ.), հաջորդելով հորը, մեծ պարսպով շրջապատել է հին Վարդգեսավանը եւ կոչել Վաղարշապատ՝ հավելելով «որ եւ Նոր քաղաք»⁵⁸: Այս նշումը պետք է հասկանալ «որը եւ (կոչվում էր) Նոր քաղաք», որովհետեւ Տիգրան Սոհեմոսի որդի Վաղարշը գահակալել է պարթեւահռոմեական հիշյալ պատերազմից հետո: Կարող ենք կարգալ նաեւ՝ «որը եւ (կոչվում է) Նոր քաղաք», բայց միայն հասկանալով, որ Վաղարշապատ անվան հետ քաղաքի նախորդ՝ Նոր քաղաք անունը շարունակել է գոյատևել: Գուցե Մովսես Խորենացին բայը չի գործածել, որպեսզի այդպես էլ հասկանանք, այսինքն՝ Վաղարշապատը կոչվում էր եւ դեռ կոչվում է Նոր քաղաք՝ զուգահեռ Վաղարշապատ անվանը:

Մեր կարծիքով՝ Տիգրան Սոհեմոսի որդի այս Վաղարշն է հիշված Ֆրոնտոյի վերոհիշյալ հատվածում եւ ոչ՝ պարթեւական թագավորի նույնանուն որդին, ինչպես ենթադրվում է, իսկ Բակուրը Տիգրան Սոհեմոսի ավագ որդին է եղել, օրինական թագաժառանգը, որին պարթեւական թագավորը Տիգրանի գերվելու պատճառով բերել էր հայոց գահին, եւ որին հեռացնելը հռոմեացիների կողմից (գուցե եւ Հայաստանը նահանգ դարձնելու նպատակով), ինչպես տեսանք, պատճառ է դարձել ապստամ-

⁵⁷ Տե՛ս Ռ. ՎԱՐԳԱՆՅԱՆ, *Լուկիոս Վերոսի օրոք Հայաստանում թողարկված պղնձե դրամներ*, ՊՐՀ, 2004, թիվ 2, էջ 234–153:

⁵⁸ ՄՈՎՍԵՍ ԽՈՐԵՆԱՑԻ, *Պատմութիւն Հայոց, գր. Բ., գլ. Կե., էջ 199–200, աշխրհ.՝ 1990, էջ 129*: Ընդունված տեսակետով՝ քաղաքի կառուցումը վերագրվում է Վաղարշ Ա.-ին, պետք է ասել՝ առանց որեւէ տեղեկություն որպես հիմք ունենալով, այլ մերժելու համար Թ. Մոմգենի այն կարծիքը, որ Արտաշատը նվաճած Պրիսկոսն է հիմնադրել Նոր քաղաքը՝ դարձնելով այն Հայաստանի մայրաքաղաք (տե՛ս Я. А. МАНАНДЯН, *О торговле и городах Армении в связи с мировой торговлей древних времен* (V в. до н. э. – X V в. н. э.), Ереван, 1930, էջ 91–93. Յ. ԱՍՏՈՐԵԱՆ, *Քաղաքական վերաբերություններ...*, էջ 214): Համաձայն Մովսես Խորենացու եւ Դիոն Կասսիոսի տեղեկությունների՝ հնագույն Վարդգեսավանը հիմնադրվել է Ք. ա. Ջ. դ. եւ նույն անվամբ քաղաք է դարձել Ք. ա. Ա. դարում Տիգրան Մեծի օրոք: Ք. հ. 164 թ.՝ հռոմեական ժամանակավոր նվաճման շրջանում, Վարդգեսավան քաղաքը, հռոմեացիներից ամրացվելով, անվանվել է Kaine polis — Նոր քաղաք եւ դարձել Հայաստանի մայրաքաղաքն ու այդ անվամբ մնացել Տիգրան Սոհեմոսի երկրորդ գահակալության շրջանում: Վերջինիս որդի Վաղարշ Բ.-ի կառուցապատումից հետո Նոր քաղաքը վերանվանվել է Վաղարշապատ՝ շարունակելով մնալ Հայաստանի մայրաքաղաքը մինչեւ Ք. հ. Դ. դարասկիզբ, երբ Խոսրով Գ. Կոտակ արքան (330–338 թթ.) մայրաքաղաք է դարձրել Դվինը:

բուլթյան, ինչի արդյունքում եւ Տիգրան Սոհեմոսը կրկին հայոց գահին է բերվել: Նրա որդուն՝ Բակուրին ընդունելով կայսերական ընտանիքում՝ Հռոմում հույս ունեին Տիգրան Սոհեմոսի եւ Ռոփիի որդիներին էլ տեսնել հայոց գահին, սակայն, ինչպես պատմահայրն է ասում, Տիգրանը, Հայաստան վերադառնալով, հրաժարվել է նրանց Արշակունի գրանցել, գուցե եւ՝ հայ նախարարների պահանջով: Ապստամբությունը, որը Բակուրին հեռացնելու համար բռնկվել էր Հռոմի դեմ, նաեւ նպաստել է, որ Տիգրան Սոհեմոսը Հռոմի հետ դաշնակցությունը պահելով հանդերձ՝ վստահություն ունենա գահը փոխանցելու ոչ թե Ռոփիի որդիներին, այլ Վաղարշին, որին նույնպես, ըստ Ֆրոնտոյի, Հռոմում գահի հավակնորդ էին համարում, երբ Տիգրանը, այսպես ասած, պատվավոր գերության մեջ էր:

Այս քննությունում ենք, որ հայկական եւ հունահռոմեական տեղեկություններն ինչպես Արտաշեսի որդի Տիրան թագավորի, այնպես եւ մյուս որդուն՝ Տիգրան թագավորի եւ վերջինիս որդիներ Բակուրի ու Վաղարշի, նաեւ նրանց ժամանակաշրջանի մասին միմյանց համագրելի են եւ ոչ՝ հակասող: Ըստ այդմ՝ դեպի Հայաստան 140-ականների սկզբին տեղի ունեցած պարթեական արշավանքի ժամանակ հայոց գահին տեսնում ենք Արտաշեսի որդի Տիրանին, իսկ 161–166 թթ. պարթեահռոմեական պատերազմի դեպքերի հետ կապված՝ Տիրանի եղբայր Տիգրան Սոհեմոսին՝ կրկին գահակալած 164 թ.⁵⁹, ինչպես եւ վերջինիս որդիներ Բակուրին եւ Վաղարշին, որոնցից առաջինը գահակալել է Հայաստանից Տիգրան Սոհեմոսի բացակայության շրջանում, իսկ երկրորդը՝ նրա մահից հետո:

Շարունակությունը՝ հաջորդիվ

⁵⁹ Տիգրան Սոհեմոսի երկրորդ գահակալության 164 թ. ընդունվում է գահակից կայսրերի դրամների հիման վրա: Հնարավոր է, որ նա, 164 թ. հռչակվելով հայոց թագավոր, Հայաստան է վերադարձել 166 թ., երբ Մարտիրոս Վերոսը Հայաստան եկավ՝ փոխարինելով Ստատիրոս Պրիսկոսին: